



# TEKS UCAPAN



**YB DATO' SERI HAMZAH BIN ZAINUDIN**  
**MENTERI KEMENTERIAN PERDAGANGAN DALAM NEGERI,**  
**KOPERASI DAN KEPENGGUNAAN**

**MAJLIS PERASMIAN SEMINAR USAHAWAN & KEPENGGUNAAN**  
**SARAWAK 2016**

**DI DEWAN MASYARAKAT LUNDU, SARAWAK**

**4 MEI 2016**

Terima Kasih Saudara/Saudari Pengacara Majlis

1. Terlebih dahulu marilah kita bersama-sama memanjatkan kesyukuran ke hadrat Allah SWT kerana di atas limpah, rahmat dan kurniaNya dapat kita bersama-sama berhimpun di Panggung Awam, Gedong, Sarawak Negeri Kenyalang pada hari ini, sempena Seminar Usahawan dan Kepenggunaan Sarawak 2016.
2. Pertama sekali saya bagi pihak seluruh warga KPDNKK selaku penganjur bersama program ini ingin merakamkan setinggi-tinggi penghargaan dan terima kasih kepada **Kepimpinan negeri ini terutamanya Yang Amat Berhormat Datuk Patinggi Tan Sri (Dr) Haji Adenan bin Haji Satem, Ketua Menteri Sarawak** di atas kesudian untuk menerima kehadiran kami menganjurkan program ini. Ia secara langsung membuktikan bahawa beliau sangat prihatin terhadap pembangunan keusahawanan di negara ini dan khususnya di Sarawak.

3. Di kesempatan ini, saya juga ingin mengucapkan berbanyak-banyak terima kasih kepada Kerajaan Negeri Sarawak kerana bersetuju menjadikan Lundu sebagai lokasi ke-3 program keusahawanan ini, yang sebelum ini diadakan di Lawas dan Gedong iaitu program Karnival Usahawan dan Kepenggunaan Sarawak. Sokongan padu yang diberikan oleh Kerajaan Negeri Sarawak dalam menjayakan program ini jelas memperlihatkan hubungan erat antara Kerajaan Persekutuan dengan Kerajaan Negeri yang sedia terjalin dan sungguh bermakna.

Para hadirin yang saya hormati sekalian,

4. Untuk makluman semua, pelbagai agenda dan program telah dilaksanakan oleh Kementerian untuk manfaat rakyat di Negeri Sarawak ini khususnya berkaitan perniagaan. Sebagai contoh, melalui program Francais, beberapa siri **Program Francais Komuniti** telah diadakan di Negeri Sarawak ini bertujuan untuk mendedahkan masyarakat di negeri ini mengenai peluang-peluang perniagaan francais yang boleh diceburi yang mana terdapat juga beberapa usahawan yang telahpun menjadi usahawan francais.
5. Manakala melalui **Suruhanjaya Syarikat Malaysia (SSM)** yang merupakan agensi di bawah KPDNKK, satu program yang dinamakan sebagai SSM-ONE telah dianjurkan; yang bertujuan mempertingkatkan kesedaran berkaitan kewajipan mendaftarkan perniagaan dan pengurusan perniagaan yang baik serta menyediakan secara *one stop centre* pelbagai kemudahan pembangunan perniagaan dan pembiayaan keusahawanan. Program ini telah diadakan pada bulan November tahun lalu, Mac serta April tahun ini di Kuching.
6. Melalui **Perbadanan Nasional Berhad (PNS)** pula Kementerian mensasarkan peningkatan bilangan perniagaan di Sarawak yang menyertai program *Business in Transformation (BIT)*. Program *BIT* merupakan platform yang sesuai bagi usahawan yang ingin memperkembangkan perniagaan mereka dan seterusnya dibangunkan

secara francais. Di samping itu, PNS juga telah memberi pembiayaan kepada 20 francais di Sarawak dan mengharapkan bilangan ini akan terus meningkat.

7. Sukacita saya ingin memaklumkan juga, bahawa bilangan koperasi berdaftar sehingga **31 Disember 2015** di Negeri Sarawak ialah **931 buah** dengan bilangan keanggotaan seramai **329,331 orang**. Manakala jumlah modal syer dan yuran terkumpul ialah sebanyak **RM165.45 juta** dan nilai aset terkumpul bagi koperasi di Negeri Sarawak bagi tempoh yang sama pula berjumlah **RM562.29 juta** dengan jumlah 'turnover' yang dicatatkan ialah **RM227 juta**. Ini menunjukkan bahawa koperasi di negeri ini adalah antara yang terbaik di antara ribuan koperasi yang terdapat di seluruh negara. Syabas diucapkan!!!

Para hadirin yang saya hormati sekalian,

8. Adalah menjadi tanggungjawab KPDNKK untuk memberi keutamaan dalam usaha menangani isu KOS SARA HIDUP bagi menjaga kepentingan rakyat sejajar dengan prinsipnya sebagai sebuah *Caring Ministry*. Atas tanggungjawab itu, pelbagai program telah diadakan di seluruh negara bagi membantu rakyat dengan menyediakan pelbagai insentif, bantuan serta kemudahan terutamanya kepada golongan pertengahan ke bawah. Ini termasuklah juga menyediakan kedai-kedai yang menjual harga barangan dengan harga yang berpatutan selain membantu meningkatkan perniagaan bagi mereka di kawasan pedalaman.
9. Bagi Negeri Sarawak, antara program yang telah dilaksanakan termasuklah:
  - **Kedai Rakyat 1 Malaysia** – Kini sebanyak 33 buah kedai KR1M telah diwujudkan di Sarawak daripada 185 keseluruhannya.
  - **Borneo Mart** – Kini terdapat 19 kedai yang telah beroperasi, manakala 20 lagi akan diwujudkan di negeri ini.
  - **Transformasi Kedai Runcit (TUKAR)** - Di Sarawak terdapat 23 kedai TUKAR sejak ia mula dilaksanakan di negeri ini pada tahun 2012.

- **Projek Pemodenan Bengkel Automotif (ATOM)** – Terdapat 15 bengkel di bawah ATOM yang beroperasi di Negeri Sarawak.

10. Alhamdulillah pada hari ini pihak KPDNKK bukan sahaja menganjurkan seminar keusahawanan, bahkan akan turut menyampaikan sumbangan berupa barang-barang keperluan serta wang tunai kepada 500 keluarga di sini. Di samping itu, pihak Kementerian melalui agensinya Bank Rakyat, akan turut menyampaikan sebuah van jenazah kepada Masjid Noorul Iman, Sematan untuk keperluan ahli kariah di sini.

Para hadirin yang saya hormati sekalian,

11. Akhir kata, saya sekali lagi mengucapkan ribuan terima kasih kepada Yang Amat Berhormat Ketua Menteri Sarawak serta anggota pentadbirannya kerana sudi menerima kehadiran kami di Bumi Kenyalang yang bertuah ini. Saya juga mengucapkan terima kasih kepada semua pihak yang terlibat samada secara langsung atau tidak langsung dalam menjayakan program Seminar Usahawan dan Kepenggunaan Sarawak 2016 ini.

Sekian. Wabillahitaufiq Walhidayah Wassalamualaikum Warahmatullahi Wabarakatuh.